

Պատմագիտական գրականության մեջ տարբեր կարծիքներ են հայտնվել Հայաստանի բաժանման տարեթվի մասին՝ 384 թ., 387 թ., 389 թ.: Հետազոտողներից ոմանք հատուկ դեպքով են բաժանման տարեթվի հարցով, իսկ մյուսները առանց քննելու կրկնել են հայտնված կարծիքները: Կ. Գյուտերբոկը և Հ. Աստուրյանը, փաստորեն, առաջիններն էին, որ հանգամանալից քննելով աղբյուրները, փորձել են ճշգրտել այդ թվականը: Կ. Գյուտերբոկը հանգել է 387 թ.¹, իսկ Հ. Աստուրյանը՝ 384 թ.²: Հետագայում Կ. Գյուտերբոկի կարծիքին (387 թ.) միացավ գիտնականների մեծամասնությունը: Հ. Մանանդյանը, որը նորից է անդրադարձել այդ հարցի առնչությամբ հունա-հռոմեական աղբյուրներին, բերում է այն կովանները, որոնց վրա հենվում էր Կ. Գյուտերբոկը և եզրակացնում, որ նա իրավացի է³:

Կ. Գյուտերբոկի հիմնական կովաններն են հունա-հռոմեական աղբյուրների հաղորդած տեղեկությունները 380-ական թթ. կայացած պարսկա-հռոմեական դիսպանությունների վերաբերյալ: Հետազոտողը դրանք բերում է հետևյալ հաջորդականությամբ. Շապուհ III-ի զահակալության առթիվ Կոստանդնուպոլիս հղված դիսպանությունը՝ 384 թ.⁴, «Թեոդոսի Լոթներորդ տարում»՝ 386 թ. դարձյալ կայսրություն ժամանած դիսպանությունը (որի ընթացքում, ինչպես ենթադրում է հետազոտողը, Հայաստանի մասին համաձայնության առաջարկություններ են եղել), հռոմեական դիսպանության ժամանումը և Ստիլիքոնի⁵ միջնորդությամբ դաշինքի կնքումը՝ 387 թ. (ըստ հեղինակի «հաշտու-

¹ K. Güterbock, Römisch-Armenien und die römischen Satrapien in 4 bis 6 Jahrhundert, Königsberg, 1900: Նույն աշխատության հայերեն թարգմանությունը տե՛ս Կ. Գյուտերբոկ, Հռոմեական Հայաստան և հռոմեական սատրապությունները Դ-Ձ դարերում, թարգմանեց Նորշան, Վիեննա, 1914, էջ 16—30:

² Հ. Աստուրյան, Քաղաքական վերաբերություններ ընդ մեջ Հայաստանի և Հռոմի, Վենետիկ—Ս. Ղազար, 1912, էջ 317—320: Հմմտ. Մ. Օրմանյան, Աղգապատում, Կոստանդնուպոլիս, 1913, § 172, էջ 247 և այլն:

³ Հ. Մանանդյան, Քննական տեսություն հայ ժողովրդի պատմության, հատ. Բ, մասն Ա, Երևան, 1957, էջ 233, 237:

⁴ Հ. Մանանդյանը նշում է, որ ենթադրվում է, թե այս դիսպանությունը նաև որոշ առաջարկներ է արել խաղաղություն կնքելու և Հայաստանի բաժանման մասին (նույն տեղում): Գիտնականը ամենայն հավանականությամբ նկատի ունի Հ. Աստուրյանի կարծիքը (նշվ. աշխ., էջ 318), որը պետք է ճիշտ լինի:

⁵ Կ. Գյուտերբոկը բերում է Ստիլիքոնի հյուպատոսության մասին բանաստեղծ Կղավդիոսի այն տողերը («Պատանի Լիր և Ասորեստան հանդիսացար հեղինակ խաղաղության. այդպիսի վայրենի ազգի մը հետ դաշնադրութիւնը յանձնուեցաւ երիտասարդիք»), որոնք նրա համար հիմք են ծառայել Հայաստանի բաժանումը դնելու 387 թ. (նշվ. աշխ., էջ 17): Նշվում է ևս մեկ պատգամավորություն՝ 389 թ., Վռամ IV Կրմանի ժամանակ (նույն տեղում, էջ 26—27): Հ. Աստուրյան, նշվ. աշխ., էջ 319): Ինչպես նշվեց, կարծիք է հայտնվել նաև, որ բաժանումը տեղի է ունեցել 389 կամ 390 թթ. (Nöldcke, Aufsätze zur persischen Geschichte, Leipzig, 1887, էջ 103: J. Markwart, Südarmenien und die Tigrisquellen, Wien, 1930, էջ 126):

թյան ծախքերն ըրած պիտի ըլլա համենայն դեպս Հայաստան»): Թեև Կ. Գյուտերբերգը գրում է, որ «բաժանման դաշնագրության կնքումը նորագույն հեղինակություններուն համաձայն՝ զրինք Թեոդոս Առաջնուն կառավարության ժամանակ, ճշտագույնս՝ 387-ին», այնուամենայնիվ նշում է, որ «այս հնթագրությունը սակայն կը կարոտի տակավին անդրագույն ապացույցի և արդարացման»: Այնուհետև նա քննում է հայկական աղբյուրները և դալիս այն եզրակացության, որ դաշինքի կնքումը պիտի է տեղի ունենար «ոչ 383-է հառաջ և ոչ 388-է ետքը»⁶:

Կ. Թումանովը փորձում է ի մի բերել գոյություն ունեցող կարծիքները, նշելով, որ ճիշտ է 387 թ. որպէս բաժանման տարի ընդունելու: Ընդ որում նա ժխտում է Ժ. Դուադի տեսակետը (384 թ.)⁷ և ընդունում է Ն. Բեյնեսի կարծիքը (387 թ.)⁸ որպէս հարցի հիմք:

Ժ. Դուադը իր տեսակետն ապացուցելու համար Ստիլիքոնի մասնակցությանը կայացած դիսպանությունը զնում է 384 թ., նշելով նաև, որ Մանվէլ Մամիկոնյանի մահը (385 թ.) տեղի ունեցավ բաժանումից հետո: Կ. Թումանովը գտնում է, որ Ժ. Դուադը ճիշտ է, երբ Ստիլիքոնի մասնակցությանը դիսպանության տարեթիվն ընդունում է 384 թ., սակայն, հակառակ Ժ. Դուադի, նա պարտադիր չի համարում, որ այն համընկներ բաժանման տարեթիվի հետ, եթե անգամ բանակցությունների ժամանակ, ինչպէս ինքն է նշում, Հայաստանի բաժանման հարցը արժարժված լիներ⁹:

Նշենք, որ Ստիլիքոնի մասնակցությանը դիսպանությունը, որը գլխավորում էր Սպորակիոսը, կայացել է, ինչպէս նշված է գրականության մեջ, նույնիսկ ոչ թե 384 թ., այլ 383 թ.¹⁰: Ինչպէս տեսնում ենք, Ստիլիքոնի մասին եղած նյութը հիմք չի կարող ծառայել բաժանման տարեթիվը 387 թ. համարելու: Ընդ որում, Ն. Բեյնեսը այս հարցի կապակցությանը հետևում է Կ. Գյուտերբերգին:

Ուրեմն, եթե Կ. Թումանովը ճիշտ է համարում Դուադին՝ Ստիլիքոնի կապակցությանը, ապա նա զրանով Կ. Դյուտերբերգի տեսակետը զրկում է այն հիմքից, որի վրա, փաստորեն, հենվում է նաև Ն. Բեյնեսի՝ իր իսկ կողմից ընդունված կարծիքը:

⁶ Կ. Գյուտերբերգ, նշվ. աշխ., էջ 22, 26—27:

⁷ J. Doise, Le partage de l'Arménie sous Théodose Ier, „Revue des Études Anciennes“ (Bordeaux), t. 47, № 3—4, 1915, էջ 274—277: Ժ. Դուադը ծանոթ չէ Հ. Աստուրյանի կարծիքին:

⁸ N. H. Baynes, Rome and Armenia in the IV century, „English Historical Review“, 25 (1910), էջ 624—643 (նույնը տե՛ս Byzantine Studies and Other Essays, London, 1955, էջ 186—208): Կ. Թումանովը վկայակոչում է նաև Ս. Տեր-Ներսեայանի Armenia and the Byzantine Empire (Cambridge, 1947, էջ 6) աշխատությունը, որտեղ, սակայն, հարցը չի քննված:

⁹ C. Toumanoff, Studies in Christian Caucasian History, Georgetown, 1963, էջ 152, ծան. 6:

¹⁰ Տե՛ս Paulys Realencyclopädie die Classischen Altertumswissenschaft, München, 1929 (1972), IIIA₂, էջ 1975, 2523—2524 (այս հարցի կապակցությանը որպէս հիմնական գրականություն է նշված՝ R. Keller, Stilicho, Berlin, 1884; Seec, Geschichte des Untergangs der antiken Welt V 69, 453): Այստեղ ասվում է, որ Ստիլիքոնը պետք է ծնված լիներ ոչ շուտ, քան 365 թ. (տե՛ս նաև W. Seyfarth, Römische Geschichte, Berlin, 1975, էջ 441), իսկ Կ. Դյուտերբերգը գրում է, որ 387 թ. նա 26 տարեկան էր (նշվ. աշխ., էջ 16):

4. Գյուտերբուքը, որոշ չափով ծանոթ լինելով հայկական աղբյուրների հաղորդած տեղեկություններին, այնուհանդերձ, Մովսես Խորենացուն համարում է VII դարում կամ դրանից ուշ ապրած հեղինակ, նշելով, որ նրա գործը «առժանհավատությունն շատ բան տուժած է»¹¹։ Ն. Բեյնեսը նույնպես գրում է, որ Խորենացու ժամանակագրությունը վստահություն չի ներշնչում¹²։ Այնինչ Խորենացու աշխատությունը հենց այն սկզբնաղբյուրն է, որը բաժանման տարեթիվը ճշտելու տեսանկյունից խիստ կարևոր է։ Բերենք Փավստոս Բուզանդի, Մովսես Խորենացու և Ղազար Փարպեցու տեղեկությունները, որոնք լույս են սփռում բաժանման ժամանակի և սլարագաների վրա։

Արշակ III-ի և նրա հղբոր՝ Վաղարշակի խնամակալ հայոց սպարապետ Մանվել Մամիկոնյանի մահից հետո, ինչպես նշում է Փավստոս Բուզանդը, նախարարներից շատերը գնացին Արշակունի ծագմամբ մեկ այլ թագավոր խնդրելու սպարսից արքայից, որն ուրախությամբ համաձայնվում է, քանի որ մտածում էր «նովալ յինքն գրաւել զաշխարհն Հայոց»։ Շապուհ III-ը (383—388 թթ.) Արշակունի տոհմից հոսրովի (III) զլխին թագ է կապում, կին է տալիս իր քույր Զրուանդուխտին և իր զորքերի ու Զիկ դաստիարակի հետ ուղարկում է Հայաստան։ Այս տեսնելով Արշակ III-ը «մերժեցաւ տեղի ետ շոգաւ պնաց ի սահմանս Յունաց, և էին թիկունք Արշակայ՝ թագաւորն Յունաց (ձեռագրում՝ «թագաւորին Հայոց», ուղղումը Բ. Պատկանյանի) և հոսրովուն՝ թագաւորն Պարսից։ Ասպ եկին զօրքն Յունաց թագաւորին ի թիկունս. և թագաւորն Արշակ զեկեղեաց գաւառաւ, և զօրքն Պարսից և արքայն հոսրով յԱյրարատ գաւառին։ Ասպ դեսպանք և հրեշտակք երկուց թագաւորացն, Յունացն և Պարսից, միմեանց առ միմեանս երթեկէին։ Եւ այնուհետեւ առնէ խորհուրդ միաբանութեան հաւանութեան ընդ միմեանս թագաւորն Յունաց և թագաւորն Պարսից. և լաւ համարեցան զաշխարհն Հայոց նախ ընդ երկուս ի մէջ իւրեանց բաժանել. զի ասէին՝ թէ ի միջի մերում բնակեալ է այս հօր և հարուստ թագաւորութիւն, լաւ է զի այսու եղծանել և խանկտրել կարասցուք զայս թագաւորութիւնս. նախ ընդ երկու բաժանել երկու թագաւորօքս Արշակունօք՝ զորս կացուցաք, ապա և ընդ նոսա կրծել ջանասցուք, աղքատացուցանել, ի մէջ արկանել ի ծառայութիւն, զի մի կարասցեն, ի մէջ մեր ամբառնալ զգլուխս։ Եւ հաստատեցին զայս խորհուրդ. ընդ երկու զաշխարհն բաժանեցին։ Բաժին կողմանն Պարսից էր թագաւորին հոսրովուն, և բաժին մասինն Յունաց էր թագաւորին Արշակայ»¹³։

Փավստոսի այս ընդարձակ հաղորդումը մանրամասն ցույց է տալիս այն սլարագաները, որոնցում ընթացավ Հայաստանի բաժանումը։ Շապուհ III-ը իր կողմից թագադրված հոսրով III-ին Հայաստան ուղարկելը արդեն խոշոր քայլ էր համարում երկրի զրավման ուղղությամբ։ Սակայն, ինչպես երևում է, դեսպանն ավելի արագ ընթացան, քան սպասվում էր։ Կայսրը, թեկուզև կարճ ժամանակով, իր «հավանավորության» տակ է առնում Արշակ III-ին, որպեսզի Հայաստանի արևմտյան մասի կլանումը կայսրության կողմից, զոնե աբտաբուստ, զրվի «օրինական» հիմունքների վրա։ Հայաստանի բաժանումը ղեկն

¹¹ Կ. Գյուտերբուք, նշվ. աշխ., էջ 23։

¹² N. Baynes, նշվ. աշխ., էջ 187, ծան. 3։ Դիտեսականը նշում է, որ հայկական աղբյուրներից ինքն օգտագործել է միայն Փավստոսի գերմաներեն թարգմանությունը (նույն տեղում, էջ 186—187, ծան. 1)։

¹³ «Փավստոսի Բուզանդացու Պատմութիւն Հայոց», Ս. Պետերբուրգ, 1883, էջ 221—222։

Թագավորական իշխանությունն վերացում չէր (այդ էն վկայում Փավստոսի տողերը), այլ միասնական՝ Մեծ Հայքի թագավորության արոհումը երկու մասի՝ իրենց թագավորներով, կայսրության և Սասանյանների գերիշխանության տակ, որը վաղ ֆեոդալական ժամանակաշրջանում հանգեցնելու էր հույկական միասնական պետականության կորստին՝ արևելյան մասում մարգարանության, իսկ արևմտյան մասում կայսրական վարչական միավորների ստեղծումով:

Այսպիսով, Փավստոսի հաղորդումից չսխալվելով, եղրակացնել, թե հոսորովի Հայաստան ուղարկվելն էր բաժանման պատճառը: Ընդհակառակը, ինչպես ստորև մանրամասն կերևա Փարպեցու և հորենացու հաղորդումներից, հոսորովի գալը և Արշակի՝ երկրի արևմտյան մասը հեռանալը պայմանավորված էին Մեծ Հայքի թագավորության բաժանումով՝ իլոդություն, որի վավերացմանն էին կոչված Փավստոսի հիշատակած պարսկա-հոմեական հերթական բանակացությունները:

Փարպեցին, հետևելով Փավստոսին, նույնպես խոսում է բաժանման մասին, ավելացնելով որոշ մանրամասնություններ: Նա գրում է, որ Արշակի թագավորության ժամանակ «բաժանեալ աշխարհս Հայոց՝ պատառեցաւ յերկուս ծուէնս, ըստ օրինակի հնացեալ ձորձոյ: ...Եւ ի բաժանելն զթագաւորութիւն Արշակունւոյն յերկուս, առ ի հնազանդեցուցանել զկողմն արևմտից աշխարհիս Հայոց՝ թագաւորին Յունաց ընդ իշխանութեամբ իւրոյ աէրութեանն, և զկողմն արևելից խոնարհեցուցանելով դառն և բռնաւոր ծառայութեամբ՝ արքային Պարսից՝ երթեալ այնուհետև նախարարքն Հայոց ի վիճակէ մասին արքային Պարսից՝ խնդրէին իւրեանց թագաւոր ըստ բնիկ նախնի կարգին յազգէն Արշակունեաց: Եւ արքային Պարսից Շապուհ կատարեալ զհայցուածս նոցա՝ շնորհէր նոցա թագաւոր հոսորով անուն յազգէն Արշակունեաց: Քանզի նախդոյն թագաւորն Հայոց Արշակ ունէր միահեծան զթագաւորութիւնն ի վերայ ամենայն աշխարհիս Հայոց: Իբրև ետես, թէ խախտեալ քայքայեալ մատնեցաւ ի բաժանումն մեծ իշխանութիւն թագաւորութեան ազգին իւրեանց՝ մեծաւ տրտմութեամբ խռովեալ տարակուսէր յանձն իւր. տեսանէր նախ զանկանելն ընդ լծով ծառայութեան երկուց թագաւորաց զաշխարհս Հայոց. և դարձեալ՝ զմեծ մասն, զլան և զպիտանին և զարգաւանդն աշխարհիս Հայոց ունել ի բաժին արքային Պարսից. քանզի թէպէտև հասեալ բազում գաւառք այլ ի ժառանգութիւն մասին թագաւորին Յունաց՝ սակայն համեմատէին այն միայն Այրարատեան գաւառին: ...Եւ խորհելով զայս ամենայն Արշակ թագաւորն ի միտս իւր՝ լքեալ մերժեալ թողոյր զբարի և զբնիկ ժառանգութիւն նախնեաց իւրոց, զգաւառն Այրարատու... ազգն Արշակունեաց յաղազս անարժան գործոց իւրեանց, ըստ բանի սրբոյ առն Աստուծոյ Ներսէսի՝ գտան եղեալք ընկեցիկք յերեսաց Աստուծոյ. մատնեցան ի բաժանումն թագաւորին Պարսից և Յունաց, որոց վիճակեալ երկուցունց զմեծ զաշխարհս Հայոց՝ բաժանեալ ծառայեցուցին: Շաղազս որոյ յուղի անկեալ գնայր յԱյրարատեան գաւառէն որպէս ի գերութիւն Արշակ թագաւորն Հայոց. լաւ համարեցաւ երթալ զհետ սուղ սակաւ բաժնի յերկիրն հաւատացեալ, և կալ ի հնազանդութիւն Յունաց թագաւորին, քան թէ կալ ի փափուկ գաւառի այսպիսի վայելչութեանց, և տեսանել հաւանալից զայսպանումն հաւատոց, զթշնամանս սուրբ եկեղեցւոյ, զնախատինս, զոր կրելոց էին պաշտօնեայք աստուածային ուխտին յանօրինաց մոգուցն, զթեթևութիւն իւրոյ ազգին և զթագաւորութեան՝ յամբարհաւաճ իշխանացն Պարսից տէրութեանն... Եւ խորհելով զայս ամենայն՝ յանկարծակի ի միտս իւր լքեալ

տարակուսեալ զբարի ժառանգութենէ զնախնեացն իւրոց՝ գնար ի ծառայութիւն թագաւորին Յունաց»¹⁴։

Փարպեցու հաղորդումից հետեւում է, որ երկրի բաժանումով էր պայմանավորված Շապուհ III-ի կողմից խոսրովին Հայաստան ուղարկելը¹⁵։ Ուրեմն իրոք, մինչև խոսրովի Հայաստան գալը և Արշակի հեռանալը երկրի արևմտյան մասը, այսինքն այն ժամանակ, երբ վերջինս դուռն ամբողջ երկրի թագաւորն էր համարվում, բանակցութիւններ են եղել պարսից արքայի և կայսեր միջև, որոնց ժամանակ որոշվել է իրականացնել երկրի բաժանումը։

Խիստ կարևոր և հետաքրքիր են Մովսէս խորենացու մոտ այս կապակցութեամբ եղած հաղորդումները, որոնց հիման վրա ճշգրիտ որոշվում է բաժանման տարեթիվը։ Նա գրում է. «Իմացեալ Շապուհ, թէ թէրուղիդ է Արկադ՝ իօսսի ընդ նմա խաղաղութիւն. քանզի էր պարտեալ հարեալ ի հօրէ նորա ի մեծէն Թէոդոսէ։ Յանձն առնու և Արկադ առնել զհաշտութիւն, առաւել յիւրոց զօրագլխացն... Վասն որոյ հաւանեալ՝ կամաւ յանձն առին բաժանել զՄիջագետս և զՀայոց աշխարհս կրկին սահմանադրութեամբ։ Վասն որոյ թողեալ Արշակայ զբուն թագաւորութիւն հարց իւրոց զԱյրարատ, և զամենայն մասն բաժնին Պարսից՝ գնաց տիրել արևմտեայ կողմանց աշխարհիս մերոյ, որ ի մասն ի բաժնին Յունաց. ոչ միայն մօրն աղագաւ, որ էր ի կայսերական քաղաքին, այլ լաւ համարեալ նուազ կողմանն տիրել՝ և ծառայել քրիստոնեայ թագաւորի, քան յովոյից իշխել՝ և մտանել ընդ լծով հեթանոսաց։ Գնացին զհետ նորա հանդերձ կանամբք և որդւովք և նախարարութիւնք որ ի բաժնին Շապուհ, թողլով զիրաքանչիւր արարս և զգիւղս և զղատակերտս։ ...Շապուհ՝ թագաւորեցոյց Հայոց ի վերայ բաժնի իւրոյ զխոսրով ոմն ի նմին ազգէն Արշակունեաց։ Արշակ... թագաւորեալ ամենայն Հայոց ամս հինգ, և կիսոցն Հայոց ամս երկուս և կէս։ Եվ այնուհետև ոչ ևս կացուցին Տոյնք ի բաժնի իւրեանց թագաւոր, այլ առաջնորդէր նախարարաց կողմանցն այնոցիկ քաջն Գաղառն. և աշխարհին իւրեանց մասինն կացուցին Տոյնք կոմէսս իշխանս»¹⁶։

Ինչպես տեսնում ենք, խորենացին ևս Փարպեցու նման գիտէ, որ Արշակի հեռանալը երկրի արևմտյան մասը և խոսրովի գահակալութիւնը արևելյան մասում պայմանավորված էին Հայաստանի բաժանումով։ Խորենացու մոտ խոսրովի և Սահակ Պարթևի մասին եղած հաղորդումներով ստույգ ճշտվում է երկրի բաժանման տարեթիվը։ Պատմահայրը գրում է, որ Սահակ Պարթևը «կեցեալ ևս իսկոպոստապետութեամբն ամս յիսուն և մի, սկսեալ յերրորդ ամէ վերջ-

14 «Ղաղարայ Փարպեցու Պատմութիւն Հայոց եւ թուղթ առ Վահան Մամիկոնեան», Տփղիս, 1904, էջ 1, 8—12։ Այս հաղորդումը Ժ. Դուազը փորձում է հիմք ծառայեցնել ասելու, թե խոսրովի գահակալութիւնը բաժանման ժամանակից ազնիւ ուղ եղավ։ Սակայն նա չի համոզում, քանի որ Արշակ III-ին նշում է որպէս Արշակ IV, իսկ խոսրովի գահակալութիւնը մոտեցնում է 387 թ. (J. Dols, նշվ. աշխ., էջ 276—277)։

15 Հմմտ. «Ապա խոսրով ոմն ի նմին տոհմէ թագաւորացն Հայոց. առ սովաւ բաժանեցին զերկիրն Հայոց ընդ երկու՝ թագաւորն Յունաց և թագաւորն Պարսից, Պարսից կողմանն՝ խոսրով թագաւորէ. մասինն Յունաց աշխարհին՝ Արշակ ոմն ի նմին տոհմէ ի թագաւորէ՝ հրամանաւ Յունաց թագաւորին» («Սամուէլի քահանայի Անեցոյ Հաւաքմունք ի գրոց պատմագրաց», հրատ. Ա. Տէր-Միքէլեան, Վաղարշապատ, 1893, էջ 267)։

16 «Մովսիսի խորենացոյ Պատմութիւն Հայոց», Տփղիս, 1913, Գ, խր, խզ, էջ 310—311, 316)։

նոյ խոսքովայ արքայի Հայոց մինչև ցսկիզրն ամին երկրորդի Յազկերտի¹⁷ և-
ղևոյ Պարսից թագաւորի, յկս ամսոյն նաւասարդի, յաւուր իւրոյ ծննդեանն»
(Գ, 4է)։

Հ. Մանանդյանը, հիմնվելով Դյուլորիի տոմարագիտական հաշվումների վրա, նշում է. «Ըստ խորենացու՝ Սահակ Մեծը կաթողիկոս էր կարգվել խոսքով Դ-ի թագավորության երրորդ տարում, այսինքն՝ 388 թ. և իր պաշտոնը վարել էր 51 տարի, ուրեմն՝ 388 թ. մինչև 439 թ.։ Ըստ իս այս բոլոր թվերը մենք կարող ենք ճշտված և հաստատուն համարել, որովհետև Դյուլորիի տոմարագիտական ճշգրիտ հաշիվներից ևս մեզ հայտնի է, որ Սահակ Մեծը վախճանվել է 439 թ. սեպտեմբերի 7-ին»¹⁸։

Հ. Մանանդյանը իրավացիորեն խոսքովի դահակալության առաջին տարին է համարում 385 թ., քանի որ Հազկերտ II-ը դահ բարձրացավ, ինչպես և ընդունված է նորագույն գրականության մեջ, 439 թ.¹⁹։ Դրա հետ մեկտեղ Հ. Մանանդյանը նշում է, որ խոսքովի թագավորել է ոչ թե հինգ տարի, ինչպես մատնանշում է խորենացին, այլ երեք տարի, ինչպես վկայում են Սերեոսը, Ասողիկը և ուրիշները²⁰։

Եթե խոսքովի դահ է բարձրացել 385 թ., նշանակում է, որ հենց այդ նույն ժամանակ Արշակ III-ը հեռացել էր Հայաստանի արևմտյան մասը և, հետևաբար, հայկական աղբյուրների հաղորդումները Հայաստանի բաժանման մասին վերաբերում են այս նույն թվականին²¹։

17 Այս արտահայտությունը Ստ. Մալխասյանցը թարգմանել է. «մինչև պարսից Հազկերտ թագավորի առաջին տարվա սկիզբը» (Մ ո վ ս ե ս խ ո Ր ե ն ա ջ ի, Պատմություն Հայոց, Երևան, 1968, էջ 314)։ Ռուսերեն այն թարգմանված է. «до начала второго года воцарения царя персидского, Язкерта» («История Армении Монсея Хоренского», пер. Н. О. Эммина, М., 1893, էջ 211), որը համապատասխանում է հրատարակված բնագրի տարբերակներին՝ «ցսկիզրն յերկրորդին» (Ե երկրորդ) ամի Յազկերտի պարսից եղևոյ» (էջ 314, տող 14)։ Այս արտահայտությունը Փարպեցու մոտ հետևյալ ձևով է բերված. «Ի սկիզբն ամին երկրորդի Հազկերտի» (էջ 37)։ Պատմիչը վկայակոչում է Կորյունին, որի մոտ գրված է՝ «յաւաջնում ամի երկրորդ Հազկերտի», որը Մ. Արեղյանը թարգմանել է «Հազկերտի առաջին տարում» (Կ ո Ր յ ու ն, Վարք Մաշտոցի, Երևան, 1941, էջ 86, 87)։ Այս արտահայտությունը կա նաև Եղիշի մոտ. «մինչ յամն երկրորդ Հազկերտի» (Ե ղ ի շ և, Վասն Վարդանայ Հայոց պատերազմին, աշխ. Ե. Տեր-Մինասյան, 1957, էջ 6), որ թարգմանված է «до второго года Язкерта» (Егнше, О Вардане и войне армянской, Ереван, 1971, էջ 27)։ Պատմիչների մոտ եղած այս արտահայտությունն ավելի հստակ թարգմանված է Կորյունի ռուսերեն հրատարակությունում. «в первом году царствования Язкерта Второго» (К о р ю н, Житие Маштоца, перев. Ш. В. Сибатяна и К. А. Мелик-Оганджанияна, Ереван, 1962, էջ 117)։

18 Հ. Մանանդյան, նշվ. աշխ., էջ 244։ Տե՛ս նաև Ed. Dulaurier, Recherches sur la chronologie arménienne, Paris, 1859, էջ 135—136, ծան. 40։ Ինչպես ճիշտ հետևում է Հ. Աստուրյանի (էջ 315) և Մ. Օրմանյանի (§ 184) հետազոտություններից, այս խոսքովի պետք է լինի խոսքով III-ը, եթե նկատի ունենանք, որ խոսքով I-ը Վաղարշ II-ի որդին էր, իսկ խոսքով II-ը՝ Տրդատ III-ի։

19 В. Г. Луконин, Культура сасанидского Ирана, М., 1969, էջ 199։ Р. Ф р а й, Наследие Ирана, М., 1972, էջ 368։

20 Հ. Մանանդյան, նշվ. աշխ., էջ 244։

21 Ինչպես տեսնում ենք, հայկական աղբյուրները խոսում են 385 թ. բաժանման մասին, իսկ Ռ. Հարությունյանը օտար աղբյուրների հիման վրա կատարված հետազոտություններում նշված 387 թ. հիմք է ընդունել ասելու, որ Սերեոսը («Սերեոսի եպիսկոպոսի Պատմություն», Երևան, 1939, էջ 19) և Ասողիկը («Ստեփանոսի Տարոնեցույ Ասողկան Պատմութիւն տիեզե-

Հետո հորենացու Արշակ III-ը թագավորել էր ամբողջ Հայաստանի վրա հինգ, իսկ «կիսոցն Հայոց ամո երկուս և կէս»:

Բուզանդը Մանվել Մամիկոնյանի խնամակալության տակ Արշակի թագավորելու մասին գրում է. «Եւ սպարապետն ղօրավարն Հայոց Մանուէլ նուաճեաց զաշխարհս, և զամենայն մեծամեծս և զնախարարսն Հայոց առ ինքն ժողովէր. և էր նա առաջնորդ և զուխ նոցա. և վարէր զիւր իշխանութիւնն, և տայր հրաման աշխարհի փոխանակ թագաւորի. և ունէր զաշխարհ ի շինութեան: Եւ զկիսն Պասոյայ արքայի զԶարմանդուխտ տիկին, հանգերձ որդոք Արշակունուք (Արշակ և Վաղարշակ—է. Դ.), առեալ զնոսա ի տեղի թագաւորի կալեալ ի սպարապետի շրջեցուցանէր ... Եւ ամենայն երկիրն Հայոց ի խաղաղութեան ընդ հովանեաւն Մանուէլի զամենայն աւուրս կենաց նորա, ամենայն մարդիկ երկիրն Հայոց վայելէին յաւուրս իւրեանց. ուտէին և ըմպէին և ուրախ լինէին զայն ամս և թն տէրութեանն Մանուէլի, մինչև ի բաժանումն երկիրն Հայոց և քակտումն թագաւորութեանն»²²:

Ինչպես տեսնում ենք, հոսսրովը Հայաստան է եկել 385 թ., ուրիմն այդ թվականին է Արշակը հեռացել երկրի արևմտյան մասը, որը տեղի էր ունեցել նույն թվականին Մանվել Մամիկոնյանի մահվանից հետո: Այսպիսով, Հ. Մանանդյանը ճիշտ է նշում Մանվել Մամիկոնյանի իշխանության տարիները՝ 378—385 թթ.²³: հորենացու հաղորդման մեջ Արշակի՝ ամբողջ Հայաստանի վրա հինգ տարի թագավորելու մասին տեղեկությունն արտացոլում է կամ այն իրողությունը, որ նա անմիջապես չի հաջորդել Վարադգատին, այլ մոտ երկու տարի անց, կամ էլ, որ ավելի հավանական է, եթե ընդունենք, որ Մանվել Մամիկոնյանի խնամակալության տակ Արշակի և Վաղարշակի թագավորության մասին Փավստոսի հաղորդումը վերաբերում է Վարադգատից անմիջապես հետո ընկած ժամանակաշրջանին, ուրիմն հորենացու մոտ «Ե»-ն հետագայում կատարված զրչական վրիպակ է «է»-ի փոխարեն:

Մանվել Մամիկոնյանի մահվան թիվը՝ 385, ապացուցվում է նաև այլ ձևով: Ամմիանոսը հաղորդում է, որ Գրատիանոսի (Gratianus)²⁴ և էկվիտուսի (Aequitus) հյուպատոսությանը (374 թ.) նախորդած տարում սպանվեց Պա-

րական», Ս. Պետերբուրգ, 1885, էջ 73) հոսսրովի գահակալության երեք տարիների մասին խոսելիս նկատի ունեն նրա թագավորության պաշտոնական ճանաչումը բյուզանդացիների կողմից 387 թ. բաժանումից հետո («Գահահամակի» թվագրման հարցի շուրջը, «Պատմա-բանասիրական հանդես», 1976, № 2, էջ 63):

22 Փավստոս, էջ 206, 211: Ստ. Մալխասյանցը Փավստոսի երկի ժամանակագրական սահմաններն է համարում 319 թ. և 384 թ. (Փավստոս Բուզանդ, Պատմություն Հայոց, թարգմ., ներածությունը և ծան. Ստ. Մալխասյանցի, Երևան, 1968, էջ 5): Կ. Գյուտերբուրկը և Վ. Զեյֆարթը Փավստոսի երկի ժամանակագրական վերջին սահմանն իրավացիորեն նշում են 385 թ., շնայած առաջինը գրում է, թե «Փավստոսը թեև բաժանման ժամանակը չի նշանակեր... և սակայն զեպրը կը դնե Մամիկոնյան Մանուելի 385-ին հանդիպած մահվանին անմիջապես հետք» (Կ. Գյուտերբուրկ, նշվ. աշխ., էջ 22), իսկ երկրորդը Արշակ II-ին շփոթում է Արշակ III-ի հետ, ինչպես նաև չի խոսում Հայաստանի բաժանման մասին (W. Seyfarth, նշվ. աշխ., էջ 470):

23 Հ. Մանանդյանը գրում է շուրջ 384/5 թ. (նշվ. աշխ., էջ 230):

24 Նա 367 թ. լինելով իր հոր՝ Վալենտինիանոս I-ի (364—375) գահակիցը, վերջինիս մահից հետո՝ 375 թ. վերջից կառավարեց Հռոմեական կայսրության արևմտյան մասում մինչև 383 թ. (W. Seyfarth, նշվ. աշխ., էջ 422):

այր²⁵։ Պատմիչի շարադրանքից երևում է, որ այդ տեղի էր ունեցել 373 թ. վերջին։ Վարապդատը նրան հաջորդել է 374 թ., և քանի որ հորենացին նրա թագավորության տարիները չորսն է համարում (Դ, Խ)։ Ուրեմն, իրոք, ինչպես նշված է զրականության մեջ (Մ. Օրմանյան, Հ. Մանանդյան), նա 378 թ. է հեռացել Հայաստանից։

Խորենացին հաղորդում է, որ Վարապդատի երկրորդ տարվանից Զավենը եպիսկոպոսապետեց չորս տարի, որին հաջորդեց Ասպուրակեսը, գահակալելով հինգ տարի (Գ, Խ—Խա)։ Հնարավոր է, որ այստեղ ևս «5»-ի զրչական վրիպակ լինի «է»-ի փոխարեն, ուրեմն այս դեպքում կատարվի, որ Ասպուրակեսը աթոռակալել է 380—387 թթ.։ Թերևս Խորենացու մի հաղորդումից, ուր ասված է, որ Ասպուրակեսի վախճանվելուց հետո Խոսրովը նրան հաջորդ նշանակեց Սահակին (Գ, ԽԲ), երևում է, որ նրանց միջև ընդմիջումը երկար չի եղել։ Այլ դեպքում կատարվի, թե Ասպուրակեսը եպիսկոպոսապետել է հինգ տարի (մինչև 385 թ.), որը քիչ հավանական է։

Մ. Օրմանյանը ներսես կաթողիկոսի և Պապ թագավորի մահվան միջև ընկած ժամանակաշրջանում տեղի ունեցած իրադարձությունների տեղեկությունը մոտ մեկ տարի է համարում, ուստի և ներսեսի մահը դնում է 373 թ., իսկ Պապինը՝ 374 թ. (§ 155)։ Բայց քանի որ, ինչպես երևում է Ամմիանոսի հաղորդումից, Պապը սպանվել է 373 թ.²⁶, ուստի, նույն տրամաբանությամբ, ներսեսի մահը պետք է տեղի ունեցած լինել 372 թ.։

Մ. Օրմանյանը առաջարկում է Զավենի կաթողիկոսության առաջին տարվա մասին Խորենացու տեղեկությունը ուղղել «չերբորդ ամի Վարադգատայ» «երկություն»-ի (376 թ.) փոխարեն, կամ համարել «վոքրիկ տարբերություն»։ Դրանով Շահակի կաթողիկոսության վերջին տարին Մ. Օրմանյանը համարում է 377 թ., որը, ըստ նրա, Զավենի առաջին տարին է, ուստի և Ասպուրակեսի եպիսկոպոսապետության տարիները նշում է 381—386 թթ. (§ 166, 174)։ Այնինչ Շահակի կաթողիկոսության տարիներն են 372—376 թթ., Զավենինը՝ 376—380 թթ., իսկ Ասպուրակեսինը՝ 380—385 (կամ 387) թթ.։ Խորենացին վերջինիս եպիսկոպոսապետության սկիզբը նշում է Արշակի (Արշակ III) երկրորդ տարին (Դ, Խա)։ Ուրեմն այստեղից ևս երևում է, որ Արշակը Մանվելի խնամակալության տակ սկսել է թագավորել 378 թ., իսկ վերջինս էլ, իրոք, կառավարել է 378—385 թթ.։ Մ. Օրմանյանը, ճիշտ նշելով Մանվելի կառավարման սկիզբը՝ 378 թ. (§ 172), նրա մահը դնում է 384 թ., որը, կարծում ենք, չի կապվում Արշակ III-ի երկրի արևմտյան մասը հեռանալու և Խոսրով III-ի Հայաստան գալու տարեթվի հետ։

Այսպիսով, Հայաստանի բաժանման մասին հայկական աղբյուրներում եղած հաղորդումները վերաբերում են 385 թ.։ Ուրեմն, իրոք կարելի է ենթադրել, որ մինչ այդ՝ 384 թ. բանակցությունների ժամանակ քննարկվել է Հայաստանը երկու մասի բաժանելու հարցը²⁷։

Առաջին քայլը եղավ երկիրը երկու մասի բաժանելը՝ երկու թագավորներով։ Քանի որ Հռոմեական կայսրության գերիշխանության տակ գտնվող փոքր

²⁵ Ammiani Marcellini rerum gestarum libri qui supersunt, with an English transl. by I. C. Rolf, London, 1958, vol. III, XXX. 1—3:

²⁶ Ammian Marc., էջ 295—313.

²⁷ Հ. Ասատուրյան, նշվ. աշխ., էջ 318:

մասը ռադիմատնտեսական ուժեղ հիմքեր չունեն և, բացի այդ, տարիներ շարունակ դրա տարբեր հատվածները՝ գտնվելով կայսրության տիրապետության տակ, կորցրել էին իրենց քաղաքական դեմքը, ուստի Արշակ III-ի մահից հետո (387 թ. կեսերը)²⁸ այնտեղ թագավոր այլևս չնշանակվեց։ Իսկ Հայաստանի՝ սլավոնական տիրապետության տակ անցած մեծագույն մասը, ուր մինչև 388 թ. շարունակեց թագավորել հոսրով III-ը, չնայած բոլոր արհամարհանքներին, ղեկավարում էր սլավոններին իր հզորությունը, նույնիսկ այնքան, որ հոսրով III-ը, այնուհետև նաև միառժամանակ Վառժապուհը, ինչպես հաղորդում է սլավոնացիները, թագավորում էին երկու մասերի վրա, հարկ վճարելով թե՛ կայսրին, թե՛ սլավոնացի արքային (Գ, խթ, ծա)։ Մ. Օրմանյանը բավական մանրամասն քննել է հոսրենացու այս հաղորդումը և որոշակի եզրակացությունների հանդեպ (§ 184—185), իսկ Բ. Հարությունյանը՝ պնդում է, որ հոսրենացու այդ հաղորդումը «ցայսօր ոչ միայն չի արժանացել ուսումնասիրողների ուշադրության սլավոնացի շահով, այլև քննադատվել է անտեղի»։²⁹ Հարությունյանը ենթադրություն է անում, թե սրանց առնչությամբ Արևիզիոսի հիշատակությունը վկայություն է այն բանի, որ իր հոր՝ Թեոդոս Մեծի կենդանության օրոք նա ղեկավարում էր արևելյան խնդիրներով «և չի բացառվում, ինչպես հայտնում է Պատմահայրը, որ հենց նա էլ վավերացրել է Մեծ Հայքի 387 թ. բաժանումը»²⁹։ Նախ. հոսրենացու հաղորդումը, ինչպես տեսանք, վերաբերում է 385 թ., իսկ Արևիզիոսի մասին հոսրենացու վկայության կապակցությամբ ղեկավարում էր մասնակին Գ. Գյուտերբուխը կարծիք էր հայտնել, թե դա կարելի է բացատրել նրանով, որ 383 թ. սկսած նա իր հոր գահակիցն էր և մասնավորապես պետության արևելյան կիսաբաժնի վրա էր իշխել³⁰։

Ինչպես նշում է Մ. Օրմանյանը, կայսրը հոսրով III-ին, այնուհետև Վառժապուհին միառժամանակ հանձնելով Հայաստանի նաև արևմտյան մասը, հույս ուներ մնացածն էլ իր կողմը դրավել (§ 184—185)։ Այս տեսակետից պերճախոս են հոսրենացու աշխատության հետևյալ տողերը. «հոսրով ...խօսեցաւ ընդ Արկաղեայ, զի լուծեալ զհաշտութիւնն ընդ Շապուհոյ՝ օգնեսցէ նմա զօրու, և սա դարձուցէ ի նա զբոլոր աշխարհս» (Գ, ծ)։

Հոսրով III-ը պետք է կարճ ժամանակ թագավորել Հայաստանի երկու մասերի վրա, քանի որ Արշակի մահվան և Հայաստանից իր հեռացման միջև ընդամենը մեկ տարի էր ընկած։ Այն, որ հոսրովը հեռացել է Հայաստանից 388 թ.՝ Շապուհ III-ի օրոք, երևում է թե՛ հոսրենացու և թե՛ Փարպեցու հաղորդումներից։ Հոսրենացին գրում է. «Շապուհ, ի հրապուրելոյ զուշակութեան նահապետացս մերոց՝ նոյն հետայն առաքէ զորդի իւր զԱրտաշիւր զօրու մեծաւ ի Հայս։ Եւ ի հրաժարել Արկաղեայ ի կուսակցելոյն հոսրովայ, և ոչ զոր յօտար ազգաց գտեալ ի սատարութիւն, անկարացեալ ընդգիմանալ կամ խուսափել ի նմանէ՝ չոգաւ առ նա։ Եւ Արտաշիւր ընկեցեալ զնա ի տէրութենէն, փոխանակ կացուցանելով զՎառժապուհ զեղբայր նորին, ոչ զմեծն Սահակ և ոչ զոր ի նախարարացն կարգելոցն ի հոսրովայ վրդովեաց ի պատուոյ իւրաքանչիւր, նա և հրամայեաց ևս ընդ Յոյնս զնոյն կարգ ունել։ Եւ թողեալ գունդ ստուար,

28 Հ. Մանանդյանը Արշակ III-ի թագավորության տարիները նշում է 378—389 թթ. (նշվ. աշխ., էջ 228)։

29 Բ. Հարությունյան, նշվ. աշխ., էջ 64։

30 Կ. Գյուտերբուխ, նշվ. աշխ., էջ 24։ Տե՛ս նաև՝ Ю. Кулаковскій, История Византии, т. I, Киев, 1913, էջ 8։

ինքն ի Տիսբոն փութայր հասանել, ի ծերութենէ հօրն ական ածեալ, ընդ իւր ունելով զհոսրով՝ զնել յԱնուշն կոչեցեալ բերդին» (Գ, Ժ)։

Մ. Օրմանյանը, համադրելով մեր պատմիչների (և հատկապես Խորենացու) հաղորդումները, Շապուհ III-ի օրոք կատարված դեպքերը տարադատել է Շապուհ II-ի ժամանակաշրջանից (§ 169, 172)։ Հ. Աստուրյանը, նույնպես քննելով Խորենացու հաղորդումները, Շապուհ III-ին, որի ժամանակ, ինչպես նշում է նա, գործել է հոսրով III-ը, տարբերել է Շապուհ II-ից³¹։

Խորենացին, նշելով, որ հոսրովին Հայաստանից հեռացրեց Արտաշիրը³², որն այնուհետև Պարսկաստանի թագավոր դարձավ, ամենայն հավանականությամբ նկատի ունի ոչ թե Վռամ IV Կրմանին, այլ հենց Արտաշիր II-ին։ Բայց քանի որ Արտաշիր II-ը այս դեպքերից հինգ տարի առաջ արդեն մահացել էր, ուրեմն պատմահայրը, նույնացնելով Շապուհ II-ին և Շապուհ III-ին, մեկ այլ անձնավորության հետ կապված գործողությունները վերագրել է Արտաշիրին³³։ Խոսքովին Հայաստանից հեռացնողը կարող էր Շապուհ III-ի ղորավարներից մեկը լինել, որը կատարում էր աթաբայի հրամանը։ Այս իրադարձությունների մասին Փալպեցին գրում է, որ պարսից արքա Շապուհը «հրաման տայր վաղվադակի հրովարտական զհոսրով ի դուռն կոչել. և նորա չղագեալ զբանսարկութիւն իշխանացն Հայոց՝ վաղվադակի որաէս առ իւր իշխան և բարեկամ ի դուռն հասանէր։ Եւ Շապուհ թշնամանեալ զնա պատուհասէր, այլ թերևս և վասն յօժարութեամբ մերժելոյ զնա ի թագաւորութենէն, և ոչ յանդիման կամեցեալ առնել զնա չարախօսացն՝ վաղվադակի մերժեալ ընկենոյր զհոսրով իշխանութենէն իւրոյ թագաւորութեանն, և ուխտէր՝ այլ ևս ոչ տեսանել զաշխարհն Հայոց, անդէն կալեալ յաշխարհին Պարսից պահէր։ Իսկ իբրև մերժեալ լինէր խոսրով ի թագաւորութենէն՝ խնդրէին Հայք ընդ Շապուհ՝ այլ թագաւոր իւրեանց. և նա հաւանեալ թագաւորեցուցանէր նոցա զՎռամշապուհ զեղբայր նորին հոսրովու, չաղէն Արշակունեաց. և թագաւորեցուցեալ զՎռամշապուհ՝ արձակէր ի Հայս» (էջ 12—13)։ Այստեղից նույնպես պարզ երևում է, որ Խոսրովի հեռացվելը և Վռամշապուհի գահակալումը եղել է Շապուհ III-ի օրոք։

31 Հ. Աստուրյան, նշվ. աշխ., էջ 315։ Հմմտ. Գ. Խ. Սարգսյան, Մովսես Խորենացու «Հայոց պատմության» ժամանակագրական համակարգը, Երևան, 1965, էջ 108—109։

32 Բ. Հարությունյանը նշում է, որ հետազոտողների զգալի մասը իրավացիորեն գտնում է, թե Արտաշիրը ոչ թե Շապուհ Երկարակյացի որդին էր, այլ նրա հորեղբայրը (նշվ. աշխ., էջ 62, ծան. 26)։ Սակայն Վ. Գ. Լուկոնինը նույնիսկ դժվարանում է Արտաշիրին Շապուհ II-ի եղբայր համարել, քանի որ գտնում է, որ վերջինիս 70-ամյա թագավորությունից հետո հազիվ թե նրա եղբայրը գահ բարձրանար (В. Г. Луконин, նշվ. աշխ., էջ 147)։

Նույն տրամաբանությամբ ուղղակի անհնար է Արտաշիր II-ին Շապուհի հորեղբայր համարել Վ. Գ. Լուկոնինը ավելի հավանական է համարում Ե. Հերցֆելդի կարծիքը, որ Արտաշիր II-ը ծագում էր Սասանյանների կողային ճյուղից (E. Herzfeld, Am Tor von Asien, Berlin, 1920, էջ 69, նույնի Paikuli, Berlin, 1924, էջ 50, В. Г. Луконин նույն տեղում)։ Այնուհետև Բ. Հարությունյանը գալիս է այն եզրակացության, որ Խոսրովին Հայաստանից հեռացնելը կատարվել է Վռամ IV Կրմանի օրոք և նույնիսկ ենթադրում է, որ Վռամի մյուս անունն էր Արտաշիր (նշվ. աշխ., էջ 65)։

33 Խորենացին չի նույնացնում Արտաշիրին և Վռամ IV-ին (Գ, Ժ)։ Վերջինս չէր կարող Շապուհ III-ի կենդանության ժամանակ Հայաստան զալ և հոսրովին ձերբակալել, քանի որ մինչ Իրանի գահի վրա հաստատվելը Վռամ IV-ը իշխում էր նախկին քուշանական թագավորությունում, ինչպես ցույց է տրված գրականության մեջ (В. Г. Луконин, նշվ. աշխ., էջ 150, հմմտ. A. Christensen, L'Iran sous les Sasanides, Copenhagen, 1944, էջ 253)։

Խոսարով III-ի հեռացվելը, ինչպես տեսնում ենք, նույնպես կապված էր Հայաստանի բաժանվածության հետ: Խոսարով III-ը ձգտել էր ինչ զնով էլ լինելով վերամիավորել Հայաստանի երկու մասերը, առկային նրա այդ ջանքերը բախվեցին Շապուհ III-ի կատաղի դիմադրությանը, ընդհուպ մինչև Խոսարովի արտաքսվելը երկրից և կալանավորվելը:

Կտրելի է եղրակացնել, որ Հայաստանի բաժանումը Հռոմեական կայսրության և սասանյան Պարսկաստանի միջև տեղի է ունեցել 385 թ.³⁴, իսկ հետևյալ տարիներին կողմերը կարող է նորից անդրադարձած լինելին հարցին³⁵՝ քաղաքական ասարեք իրավիճակներից ելնելով: Հայաստանի IV դարի 80-ական թթ. պատմությունն այն սահմանադիծն էր, երբ Հռոմեական կայսրության և պարթևական Իրանի, այնուհետև Սասանյանների դուրեր տևած նվաճողական քաղաքականությունը թևակոխեց իր հաջորդ փուլը՝ ֆեոդալական դարաշրջանում դոներ բացելով սոր նվաճումների և բռնությունների համար:

ГОД РАЗДЕЛА АРМЕНИИ—387 ИЛИ 385?

Кандидат историч. наук Э. Л. ДАНИЕЛЯН

(Резюме)

В условиях осуществления захватнической политики Восточной Римской империи и сасанидской Персии Армения в середине 80-х гг. IV в. оказалась перед фактом раздела. В научной литературе высказывались различные мнения о годе раздела (384, 387, 389); датировка его 387 г. является доминирующей. Основным доводом сторонников этой датировки является приурочение византийского посольства к персидскому двору к 387 г. Однако возглавленное Споракием с участием Стилихона византийское посольство вело переговоры, на которых должен был стоять и вопрос о разделе Армении, не позднее 384 г. Из сообщений Фавстоса Бузанда, Мовсеса Хоренаци и Лазара Парпеци следует, что в результате раздела царствовавший до этого над всей Арменией Аршак III (378—385) был вынужден удалиться в западную часть страны, где он процарствовал еще два с половиной года (385—387), а царем восточной части Шапур III (383—388) назначил Хосрова III (385—388). Сообщения Мовсеса Хоренаци создают солидную хронологическую базу

³⁴ Ինչպես նշում է Ն. Ադոնցը, Մամեդենը գտնում է, որ ընայած Պոնտիկոս Սիլվիոսը V դարի հեղինակ է, սակայն նրա կողմից կազմված Laterculus-ի բովանդակությունն ավելի վաղ ժամանակաշրջանի է վերաբերում՝ ոչ ուշ քան 386 թ.: Այնտեղ հիշատակվում են Armenia minor և Armenia maior երկրամասերը, որոնք մտնում էին Pontica դիոցեզի մեջ: Գիտնականը նշում է նաև, որ Armenia maior շարունակում է անվանվել հռոմեացիներին անցած Հայաստանի այն մասը, որը, ըստ երևույթին, պաշտոնապես կոչվում էր Armenia interior (նեբրին Հայք՝ նույն Բարձր Հայքը. տե՛ս Н. Адонц, Армения в эпоху Юстиниана (СПб, 1908), Ереван, 1972, էջ 28—29, 86): Արդյունք 385 թ. տեղի ունեցած բաժանման հետևանք չպետք է լինի Laterculus-ում արված այդ հիշատակությունը:

³⁵ Հետաքրքիր է Հ. Աստուրյանի նշումը, որ երկրորդական կետերի կարգավորումը տևեց մինչև 389 թ. (նշվ. աշխ., էջ 319: Հմմտ. Լեոն, Հայոց Պատմություն, հատ. II, Թիֆլիս, 1917, էջ 669, J. Doise, նշվ. աշխ., էջ 277):

для определения года раздела. Согласно Хоренаци, с третьего года царствования Хосрова католикосом Армении был Саак Партев, патриаршествовавший 51 год и скончавшийся в начале царствования Иездигерда II (439—457). На основании этих данных в историографии выяснено, что Саак Партев умер в 439 г., а начало царствования Хосрова относится к 385 г.

Так как армянские источники считают временем раздела год ухода Аршака III в отошедшую к империи западную часть Армении и воцарения Хосрова III в восточной части, оставшейся под контролем Сасанидов, из сказанного следует, что раздел Армении произошел в 385 г., после переговоров, имевших место в 384 г.